



Museum Ladin: mostra de Scedola de Manuel Riz

N venerdì ai 07 de utober, dala 6 da sèira saral tl Museum Ladin a San Martin de Tor la inaugurazion dla mostra de dessènie de „*Scedola*“ dl artist Manuel Riz. N chëla ucajian uniral dat ora nce na publicazion cun chëla che l Museum Ladine uel nia mé fé cunëscer al publich n artist jëunn, ladin che à bele arjont n suzes a nivel naziunel, ma nce presenté n medium artistich particular che ie chël di comics.

Coche esprescion artistica à i dessènie comics daniëura arjont n publich lerch y chisc ie nce pensei perchël, ma i ne vën nia prijèi tan dassënn te si forma artistica coche i se meritëssa. Defati ne se limitea chisc dessènie nia mé a n vester estetich, ma i à n senificat plu sot. La realizazion fina di dessènie se dumanda cunescënzes tecniches dl ert de adurvé l rispl ma nce dla capaziteies de usservazion, richëza de idees o fantasia y chëstes, sambënzënza, liedes a na certa ironia. Nia per ultim dëssa i dessènie nce devertì y cun maestria dëssa i comics unì acumpaniei da n juech de paroles che porta pro che la sozietà vënie usserveda cun n uedl plu critich. Nsci à l cartoon tres si esprescion l duvier de fé pensé do sun cie che suzed y perchël vëniel nce cunsciderà velch deplù de n n prudot puramënter artistich.

Duta la carateristiches de chësta forma artistica possen udëi ti dessènie dla figura “*Scedola*” de Manuel Riz. “*Scedola*” ie nasciù do che Manuel Riz ova venciù n cuncors scrit ora dal’Union Generala di Ladins, per la realizazion de n personaje da adurvé coche comics tla Usc di Ladins. Si talënt de nterpreté la sozietà da al didancuei cun ironia sutila y fina ie sterch tla esprescion, ma daulëibon y ne ufënd nia. Cun si capaziteies creatives àl davanià trüep pesc speziei n ucajian de cuncorsc per dessènie comics. Nsci al bele pià do plu iedesc n pest pra la “Biennale Internazionale dell’Umorismo nell’arte” a Tolentino tla provinzia de Macerata y à tët pert al Festival Acquaviva nel fumetto tla provinzia de Ascoli Piceno.

Tres chësta mostra y cun l catalogh, che ie nasciù sun iniziativa dl Museum Ladin Ciastel de Tor y che ie l frut de na cunlaurazion cun l’Union Generala di Ladins, uel la doi istituzions recunëscer la capaziteies artistiches de Manuel Riz y ti auguré nce tl daunì suzesc che sarà dessegur meritei.

La mostra sarà da udëi nchin ai 30 de utober dal merdi ala sada dala 10.00 ala 18.00 y la dumënia dala 14.00 ala 18.00. L Museum Laadin nvieia duc canc ala giaurida, coche dit n venerdì dala 18.00 tl Museum Ladin a San Martin de Tor.

L diretëur dl Museum Ladin Cíastel de Tor
Stefan Planker